

Ырым қылғанның ықыласы болады,

алақаны ырысқа толады

АҒЫМДАҒЫ ЖЫЛЫ ҚАЗАН АЙЫНЫҢ 8-9 КҮНДЕРІ ІІМ БӘРІМБЕК БЕЙСЕНОВ АТЫНДАҒЫ ҚАРАҒАНДЫ АКАДЕМИЯСЫНДА АЙМАҚТЫҚ ІІД МЕН КӨЛІКТЕГІ ІІД БАСТЫҚТАРЫНЫҢ ТЕРГЕУ БОЙЫНША ОРЫН-БАСАРЛАРЫ ҚАТЫСҚАН ОҚУ-ӘДІСТЕМЕЛІК ЖИЫН ӨТКЕНІ ЖАЙЛЫ БҰДАН БҰРЫН ДА ХАБАРЛАҒАН БОЛАТЫНБЫЗ. («ТЕРГЕУ САЛАСЫНЫҢ ТЫҢ ТЕХНОЛОГИЯСЫ ТАЛҚЫЛАНДЫ» №76, 16 ҚАЗАН 2012 ЖЫЛ).

Ішкі істер министрі, полиция генерал-лейтенанты Қалмұханбет Қасымов, Ішкі істер министрінің орынбасары, қаржы полициясының генерал-майоры Ерлік Кененбаев, Тергеу комитетінің төрағасы, полиция полковнигі Марат Қожаев бастаған бір топ офицерлер ресми кездесулерден кейін Академия тыныс-тіршілігімен танысып, онда білім алып жатқан тыңдаушылармен жүздескен еді.



Кездесу кезінде оқу орны жатақханасын аралып шыққан қонақтардың бірі, осы Академияның түлегі – полиция полковнигі Марат Қожаев кезінде өзі білім алған төрт жылда екінші үйіне айналған оқу ошағын ыстық ықыласпен есіне алып, тіпті, өзі жатқан төсек-орнын да таныған еді. Ырымдап, төсек-орынның бүгінгі «иесінің» жастығының астына ақша да тастап кеткен-тін. Ал, бүгінде комитет төрағасының орны 2-курс тыңдаушысы Ержан Жолдасовқа «бұйырған» екен. Жедел-іздістіру қызметі бойынша білім алып жатқан Ержан бұл сәйкестікті жақсыға жоритынын жасырмады. «Бала кезімнен тәртіп сақшысы болуды армандап өстім, – дейді ол. – Шым-шытырық оқиғаға толы кітаптарды жастанып оқитынмын. Бүгінде міне, арман жолымның бір шыңын бағындырып, ІІМ-нің Қарағанды Академиясында білім алып жүрмін. Ал, Тергеу комитетінің төрағасы Марат Шадетханұлы ағамның орнын басқаным жақсылықтың нышаны шығар. Кім білсін, болашақта мен де сол кісідей бір саланың тізгінін ұстаған білікті маман атанармын».

Алматы облысына қарасты Іле ауданының тумасы Ержан Ермекұлы бүгінде небәрі 19 жаста. Оқу орнында мінезінің салмақтылығымен ерекшеленетін Ержанға ұстаздары «тәртіп пен тазалықты қатаң сақтайтын тыңдаушы» деп баға берді.